

廿二史考異

漢書三

廿二史攷異

錢大昕學

陳勝傳

陳勝字涉陽城人師古曰地理志屬汝南郡按汝南
潁川皆有陽城縣汝南之陽城爲侯國宣帝時始置
此當是潁川之陽城也

項籍傳

梁使羽與沛公別攻城陽城陽當作成陽

諸別將皆屬號卿子冠軍皆屬下當有義字

瑕邱公申陽者孟康曰瑕邱縣之老人也姓申名陽

攷異

予謂此公非老人之稱春秋之世楚縣令皆僭稱公楚漢之際官名多沿楚制故漢王起沛稱沛公楚有蕭公薛公鄴公留公柘公漢有滕公臧公皆縣令之稱此瑕邱公亦是瑕邱縣令孟說非也

張耳傳

東井者秦分也先至必亡 亡字疑誤

賈高等乃壁人柏人要之置廁文穎曰置人廁壁中以伺高祖 予謂置者郵傳之名廁與側同非廁溷之廁也伏人於置側欲要而殺之

韓王信傳

成帝時繼功臣後封增兄子岑爲龍額侯薨子持弓嗣
按功臣表元封當作元延元年節侯共以寶從父昆弟
紹封子敞嗣蓋增之兄子於寶爲從父昆弟也惟兩
侯之名表傳各異未詳孰是

荆燕吳傳

荆王劉賈 宗室王例不書姓劉賈劉澤獨書姓衍文
故孽子悼惠王王齊七十二城庶弟元王王楚四十城
按高帝紀封齊王七十三縣此云七十二或彼文
誤也楚元王傳及高紀俱云王三十六縣此云四十
城恐誤

御史大夫量錯營或天子師古曰營謂回繞之也 營

與熒通非回繞之義

劉向傳

父德武帝時治淮南獄 按淮南王安以謀反誅事在

元狩元年此傳言昭帝卽位德待詔丞相府年三十
餘自元狩元年數至後元二年昭帝卽位實三十六
年矣當淮南獄起之時恐德尙未生安得預治獄之
列

孝武帝時兒寬有重罪繫按道侯韓說諫曰前吾卬壽
王死陛下至今恨之今殺寬後將復大恨矣上感其

言遂實寬復用之 此事寬傳不載韓說各在佞幸
傳而能爲寬強諫亦自可取當表而出之

下太傅韋元成 元成爲太子太傅不當刪太子字蓋
轉寫失之

故其詩曰密勿從事 密勿卽黽勉聲之轉也古讀勿
如沒余雅蘊沒勉也亦密勿之異文

日月鞠凶 鞠告聲相近

雨雪漼漼見睍聿消 聿曰聲相近

易曰飛龍在天大人聚也 聚造聲相近

及秦惠文武昭嚴襄五王 惠文一也武二也昭三也

嚴襄卽莊襄四也此云五王者蓋昭王之後尙有孝文王傳脫孝文二字耳

劉歆傳

博見強志 志古識字後文賢者志其大者不賢者志其小者藝文志多見而志之皆從古文

田叔傳

趙陘城人也 史記陘城今在中山國攷地理志中山有苦陘有陸成無陘城縣也

曹參傳

遂取臨淄還定濟北郡師古曰時未有濟北郡史追書

之耳 按項羽封田安爲濟北王都博陽田榮攻殺
安并三齊之地因以濟北爲郡非追書也

擊龍且軍於上假密文穎曰或以爲高密 高假聲相
近

參之相齊齊七十城 按吳王濞傳悼惠王王齊七十
二城高五王傳亦云食七十餘城此云七十者舉成
數也

哀帝時乃封參元孫之孫本始爲平陽侯 按功臣表
本始乃參元孫之元孫傳脫元字

張良傳

景駒自立爲楚假王在陳畱 陳字衍

封雍齒爲什方侯 功臣表作汁防

陳平傳

陽武戶牖鄉人也師古曰陽武縣名屬陳畱 按地理志陽武屬河南不屬陳畱

更封平爲曲逆侯盡食之 漢時封縣侯戶數多少不同如蕭何始封鄼食八千戶後又益封二千戶元狩中以鄼戶二千四百封其曾孫慶宣帝時以鄼戶二千封其元孫建世封號雖同而租入迥別蓋一縣之戶不止此數除侯所食外其餘歸之有司也高祖功

臣盡食一縣者惟平一人

周勃傳

於是陰謀以爲少帝及濟川淮陽恒山王皆非惠帝子

此稱恒山後稱常山史駁文也攷外戚恩澤侯表

高后時以孝惠子侯者四人襄城侯義三年爲常山

王

要名宏

卽少帝也軹侯朝四年爲常山王壺關侯武

六年爲淮陽王昌平侯大七年爲呂王異姓諸侯王

表高后七年呂王產徙梁十一月丁巳王大始故平

昌侯

恩澤侯表作昌平侯

傳稱濟川王表稱呂王其實一人也

初高后割齊之濟南郡爲呂王奉邑及呂產徙封改

呂國曰濟川以王孝惠之子此事之所宜有者則濟川卽濟南矣孝景時分梁爲濟川國攷梁孝王始封其時濟南王辟光尙存七國旣平梁又未嘗益封此兩濟川者名同而實異也

文帝擇勃子賢者皆推亞夫廼封爲條侯師古曰縣在勃海地理志作脩字其音同耳按地理志勃海郡有脩市縣侯國應邵讀脩爲條此清河綱王子寅所封也又信都國有脩縣師古亦讀爲條亞夫所封蓋信都之脩非勃海之脩市也志作脩不作脩小顏注誤

夏侯嬰傳

夏侯嬰沛人也。嬰本夏侯氏而標目稱滕不稱夏侯石奮傳標題不云石而云萬石皆因史公元文然於例終未盡一

曾孫頗尚平陽公主坐與父御婢姦自殺國除頗尚主
主隨外家姓號孫公主故滕公子孫嬰爲孫氏 按
漢景帝女平陽公主本陽信公主王皇后生元帝女
平陽公主衛婕妤生其外家皆非孫氏此夏侯頗所
尚之平陽公主蓋別是一人不知何帝女也馬端臨
帝系攷載高祖一女魯元公主文帝二女館陶長公

主及周勃子勝之所尚公主景帝三女平陽公主南宮公主隆慮公主武帝五女鄂邑蓋長公主夷安公主衛長公主諸邑公主陽石公主宣帝二女館陶公主敬武公主元帝三女平都公主平陽公主潁邑公主皆據班史紀傳然尚有未備如博成侯張建建始四年坐尚陽邑公主與婢姦主旁數醉罵主免夏侯頗尚平陽公主成帝微行過陽阿主作樂此三事皆遺漏而南宮公主壻彤申見功臣侯表馬氏亦失書

灌嬰傳

灌嬰睢陽販綰者也 依班史例當云睢陽人也以販

繪爲生

傅寬傳

傅寬以魏五大夫騎將從 傅寬斬歙二人史失其所

居郡縣

酈食其傳

陳畱高陽人也 按地理志陳畱郡無高陽縣蓋鄉名

非縣名涿郡琅邪郡皆有高陽縣然非食其所居之

高陽也高祖紀沛公西過高陽文穎云聚邑名屬陳

畱圉

按圉縣漢屬淮陽後漢始屬陳畱

臣瓚云陳畱傳在雍邱西南

婁敬傳

婁者劉也賜姓劉氏 婁劉聲相近今吳人呼婁江曰
劉家河吾邑婁塘市土人亦呼劉

濟北王勃傳

國除爲北安縣屬泰山郡 按地理志泰山郡無北安
縣惟盧縣注云濟北王都疑北安爲盧之誤或初名
北安而後改盧也

息夫躬傳

烏孫兩昆彌弱卑爰寔强盛 卑爰寔匈奴傳作卑援
寔

循烏孫就屠之跡 孫字衍

衛綰傳

代大陵人也 按地理志大陵縣屬太原不屬代郡漢初以山南太原之地屬代國故繫大陵於代

直不疑傳

稍遷至中大夫 按公卿表景帝中六年中大夫令直不疑夏爲衛尉此傳脫令字中大夫令本衛尉也景帝初改後復

周仁傳

以是得幸入臥內 周仁列於佞幸乃與萬石君直不疑同傳似非其倫

張敞傳

景帝時尊重常爲九卿至武帝元朔中代韓安國爲御史大夫按公卿表敞代安國爲御史大夫在元光四年非元朔也任御史大夫五年以老病請退則在元朔中耳表於景帝五年書安邱侯張敞爲奉常據傳敞爲安邱侯說少子未嘗嗣侯此表之誤也又表於景帝元年有廷尉敞不書姓疑亦張敞也

文三王傳

地北界泰山西至高陽蘇林曰陳畱北一作縣高陽非縣名文穎以爲聚邑名者得之

與睢陽太守客俱出同車 按睢陽非郡名不得有太守當作淮陽因上有睢陽字相涉而誤耳史記本作淮陽淮陽國景帝四年除爲郡故得置太守梁與淮陽接壤故太守客得至梁境爲睢陽人所殺也

賈誼傳

夫樹國固必相疑之執 沈彤曰夫當作大鄭氏云今建立國泰大其執必固相疑也若作夫樹國云云則當請廢封建矣或於固字句絕則當請無立國於險矣而下文皆不之及但言國不可太大宜衆建諸侯而少其力故知夫爲大之譌

諸侯之地其削頗入漢者爲徙其侯國及封其子孫也
所以數償之 沈彤曰也當作他謂諸侯或以罪黜
其地被削多入於漢者若因其所存地爲國則國小
而其子孫亦不得封故爲之徙其侯國并封其子孫
於他所如其被削之數償之也師古注誤

病非徒瘡也又苦蹠盤師古曰蹠古蹠字音之石反足
下曰蹠今所呼腳掌是也 按說文無蹠字小顏讀
爲蹠恐亦臆說當是蹠字之譌說文蹠脰肉一曰曲
脰讀若達渠追切 蹠亦當從說文作蹠蹠彌戾也蹠蹠
謂足脰反戾不便行動

龍錯傳

丞相青翟中尉嘉廷尉敞劾奏錯 是時開封侯陶青
爲丞相翟字衍文也因武帝時有丞相嚴青翟相涉
而誤景帝紀元年遣御史大夫青翟誤與此同

枚乘傳

凡可讀者不二十篇 不當作百藝文志枚舉賦百二
十篇

路溫舒傳

鉅鹿東里人也 地理志鉅鹿郡無東里縣

韓安國傳

攷異

卷之二

梁城安人也 按地理志成安縣屬陳畱郡陳畱本梁地武帝始置爲郡故史繫之梁耳城當作成

若是則北發月氏可得而臣也師古曰發猶徵召也

北發北狄地名師古注誤詳見武帝紀

趙敬肅王彭祖傳

大鴻臚禹 王禹也

中山靖王勝傳

令諸侯以私恩自裂地分其子弟而漢爲定制封號輒

別屬漢郡 按地理志諸侯王國二十如趙真定河

間廣陽城陽廣陵皆止四縣菑川泗水止三縣高密

六安皆五縣魯六縣東平楚皆七縣竊疑漢初大封
同姓幾據天下之半文景以後稍有裁制狀諸侯王
始封往往兼二三郡之地其以罪削地者史亦不多
見何至封域若此之小及讀中山王勝傳謂武帝用
主父偃謀令諸侯以私恩自裂地封其子弟而漢爲
定制封號輒別屬漢郡漢有厚恩而諸侯地稍自分
析弱小云始悟諸侯王國所以日削者由王子侯國
之多以王子侯表徵之城陽五十四人趙三十五人
河閒二十三人菑川二十一人魯二十人王國之食
邑皆入於漢郡無怪乎封圻之日蹙矣郡領縣多者

無過於琅邪東海琅邪縣五十一東海縣三十八琅
邪與城陽菑川膠東高密四國鄰東海與魯泗水楚
城陽諸國鄰侯國之析置者多屬焉此所領之所以
多於它郡也中山之陸成表作陸城新處表作薪處安險皆嘗
爲侯國改屬它郡矣陸成新處皆屬涿惟安險表失書所屬亦當屬涿郡也宣
元之世中山絕而復封所封又是帝子故稍以舊封
益之如北新成劉向以爲涿郡地理志末論十二國分域蓋出於劉向
而志屬中山亦是後來益封之證也

哀帝復立雲客弟廣漢爲廣平王薨無後平帝元始二
年復立廣川惠王曾孫倫爲廣德王奉靖王後 羅

頤曰按諸侯王表廣漢至王莽時猶在安得遽云薨
無後此廣德王倫自以廣川系絕故封攷之廣川惠
王傳可見非續中山也中山子孫侯者二十餘人不
應取於見絕之廣川明矣大昕按劉敞以此倫封廣
德王廣川王後又封廣德王俱是平帝二年事必有
一誤今據羅氏辨正則此傳薨無後以下二十三字
明是衍文倫瘞字形相近非有二人也

李廣傳

隴西成紀人也 按地理志成紀縣屬天水不屬隴西
天水郡武帝所置漢初蓋屬隴西也

典屬國公孫昆邪 卽平曲侯公孫渾邪丞相賀之大父也

將軍其率師東轅彌節白檀孟康曰白檀縣名屬右北平 按地理志白檀屬漁陽不屬右北平孟注因下有右北平字而誤耳

衛青霍去病傳

路博德西河平州人 地理志西河郡有平周無平州董仲舒傳

先是遼東高廟長陵高園殿災仲舒居家推說其意少橐未上主父偃候仲舒私見嫉之 按主父偃傳元

光元年西入關而高廟高園殿災乃在建元六年其
明年始改元元光計其年月似不相應

公孫宏傳

其以高成之平津鄉戶六百五十封丞相宏爲平津侯
恩澤侯表云三百七十三戶高成屬勃海郡表作
高城

好問近乎知 此禮記中庸文今本作好學

兒寬傳

居位九歲以官卒 表稱爲御史大夫八年卒

張湯傳

効鼠掠治傳爰書 傳當作傳傳音附謂附於爰書也
師古訓爲傳達似非

王朝齊人以術至右內史 公卿表作王鼃鼃與朝同
司馬遷傳爰益朝錯列傳第四十一卽鼃錯也

張安世傳

子勃嗣 表作倣古書勃爲敦敦與倣字形相涉因譌
爲倣耳

杜業傳

業有材能 業字君都見公卿表

鉅鹿太守孫宏 翟方進傳作孫闕

司馬遷傳

昔在顓頊 劉知幾謂篇首當云司馬遷字子長馮翊
夏陽人繼以其自序曰云云方合著述之體其說固
戾戾此例人所共知孟堅命世大才詎猶未了蓋叔
皮父子踵史遷而作書故自敘一篇悉因舊文附以
後事取述而不作之義意主撝謙非失於檢照也

燕刺王旦傳

其者寡人之不及與 其者之者讀如諸

廣陵王胥傳

宣帝卽位封胥四子聖曾寶昌皆爲列侯 下文云胥

子南利侯寶坐殺人奪爵卽四侯之一也子弟晦之
曰攷王子侯表但有朝陽荒侯聖平曲節侯曾南利
侯昌三人別無名寶者表稱南利侯昌地節二年坐
賊殺人免此傳云南利侯寶疑誤

武五子傳贊

建元六年蚩尤之旗其長竟天後遂命將出征略取河
南建置朔方其春戾太子生 按本傳戾太子元狩
元年立爲皇太子年七歲矣初上年二十九乃得太
子甚喜以年歲推之戾太子生於元朔元年非建元
六年也衛青傳元朔元年春衛夫人有男外戚傳孝

武衛皇后元朔元年生男據遂立爲皇后立七年而男立爲太子皆與本傳合孟堅贊語似未推校年歲若衛青收河南置朔方郡則在元朔二年又在戾太子生之後矣

嚴助傳

而中國之人不能其水土也師古曰能堪也能耐二字古書多通用食貨志能風與旱暵錯傳其性能寒其性能暑趙充國傳漢馬不能冬西域傳不能饑渴師古皆讀如耐此亦當從耐音

朱買臣傳

會邑子嚴助貴幸 邑子猶言邑人助與買臣皆吳人

同邑故有邑子之稱疏廣傳公卿大夫故人邑子設

祖道供張東都門外趙廣漢傳廣漢疑其邑子榮畜

教令

師古曰蘇賢同邑之子也

尹翁歸傳定國家在東海欲屬託

邑子二人

師古曰邑子同邑人之子也

皆與此同義六朝碑多有

題邑子者

吾邱壽王傳

吾邱壽王 兩都賦序作虞邱虞吾聲相近

東方朔傳

平原厭次人也師古曰高祖功臣表有厭次侯爰類是

則厭次之名其來久矣而說者乃云後漢始爲縣於此致疑斯未通也 按地理志平原郡有富平侯國應劭云明帝更名厭次後人因疑西京無厭次之名攷厭次侯爰類傳子至孝文五年以謀反誅國除而張安世封富平侯在昭帝時其封邑本在陳留郡及子延壽嗣侯上書讓減戶邑徙封平原乃在宣帝之世狀則昭帝以前平原無富平侯國也蓋厭次國除之後本爲厭次縣宣帝移富平侯國於此始去厭次之名明帝時仍復其舊水經注謂厭次故名非始明帝蓋復故耳其說精而當矣漢時列侯國除有卽爲

縣者如武帝以穰之盧陽鄉宛之臨駢聚封霍去病
爲冠軍侯去病子嬪薨國除爲冠軍縣是也武帝以
高成之平津鄉封公孫丞相爲平津侯元帝以僅之
樂安鄉封匡衡爲樂安侯而地理志無平津樂安縣
是國除之後仍爲鄉矣南陽郡有博山侯國故順陽
縣哀帝以封丞相孔光改名明帝改曰順陽亦是從
其舊名與厭次正相類

是婁數也師古曰婁數戴器也以盆盛物戴於頭者則
以婁數薦之 釋名婁數猶局縮皆小意也說文檣
盪負戴器婁數卽檣盪聲之轉也與寄生聲亦相近

故樹上之寄生亦有隻數之名廣韻隻數四足儿也
此與蘇林四股鉤之說相近皆以形相似名之

公孫賀傳

語在江充戾園傳 按外戚王夫人傳云語在戾太子

傳劉屈氂傳云語在太子傳

上文有戾字故但稱太子

而此與江

充傳俱稱戾園亦例之不一也

朱雲傳

成帝時丞相故安昌侯張禹以帝師位特進甚尊重

按禹以成帝河平四年爲丞相鴻嘉元年以老病乞骸骨賜安車駟馬罷就第以列侯朝朔望位特進此

稱位特進則在罷相之後故朱雲但斥言安昌侯張禹不言丞相而成帝亦但以廷辱師傅罪雲也文當云故丞相安昌侯今本以故字屬丞相下乃轉寫之誤耳

梅福傳

書曰毋若火始庸庸 今本作餒餒庸餒聲相近

遂下詔封孔子世爲殷紹嘉公 孔何齊初封殷紹嘉侯尋進爵爲公

霍光傳

自先帝時桀已爲九卿 公卿表後元二年太僕上官

桀爲左將軍其初除太僕表不得其年蓋征和二年
公孫敬聲有罪下獄卽以桀代之也

御史大夫蔡誼 卽蔡義也儒林傳亦作蔡誼按鄭仲

師注周禮云古者書儀但爲義

卽威儀字

今時所謂義爲

誼

卽仁義字

漢書項籍傳贊仁誼不施董仲舒傳布德施

仁以厚之設誼立禮以導之知自貴於物朕後知仁

誼知仁誼朕後重禮節將欲興仁誼之休德明帝王

之法制正其誼不謀其利五尺童子羞稱五伯爲其

先詐力而後仁誼也夏侯勝傳孝武皇帝躬仁誼皆

以誼爲義義者宜也故字从宜

儒林傳東郡太守韋誼卽韋義

金日磾傳

宣帝卽位賞爲太僕霍氏有事萌牙上書去妻 按公卿表宣帝甘露四年秭侯金賞爲侍中太僕距霍氏之亡已十六年矣霍氏有事之始賞祇爲侍中未任太僕也

日磾傳子節侯賞 功臣表失載賞諡

趙充國傳

至征和五年 按征和無五年疑有誤

數使使尉黎危須諸國 西域傳作尉犁

充國乞骸骨賜安車駟馬黃金六十斤罷就第 按公

卿表于神爵二年書後將軍充國不言何年罷免據此傳似卽是神爵二年事而常惠傳言甘露中復將軍充國薨天子遂以惠爲右將軍則充國雖以病免宣帝猶以將軍待之終充國之身虛將軍位不置也元始中修功臣後復封充國會孫伋爲營平侯 恩澤侯表失載此事

常惠傳

是時烏孫公主上書言匈奴發騎田車師 此傳與西域傳相同者幾三百言

諡曰壯武侯 功臣表作壯侯

陳湯傳

君子以功覆過而爲之諱行事 按小顏解行事爲滅項之事是也劉貢父疑其不辭欲以行事屬下句淺陋可笑

西域都護段會宗爲烏孫兵所圍驛騎上書願發城郭敦煌兵以自救丞相王商大將軍王鳳及百僚議數日不決 按會宗傳竟寧陽朔中再爲西域都護且云爲烏孫所圍惟元延中嘗被圍其時又非都護且不與丞相王商大將軍王鳳同時此傳云會宗爲烏孫所圍似當在陽朔中又攷公卿表王商于河平四

年罷相以張禹代之其明年始改元陽朔使會宗果于陽朔中被圍則丞相乃張禹非王商矣以二傳參互攷之當有一誤或會宗傳陽朔字當爲河平或此傳王商當爲張禹也

段會宗傳

天水上邽人也 按地理志上邽縣屬隴西趙充國傳外戚上官皇后傳亦云隴西上邽人此作天水疑誤末振將殺大昆彌會病死漢恨誅不加 按西域傳大昆彌翎侯難柢殺末振將漢恨不自責誅末振將復使段會宗斬其太子番邱會宗以難柢殺末振將雖

不指爲漢合於討賊奏以爲堅守都尉是末振將實
難栖所殺傳以爲病死者誤也

小昆彌烏犂靡者末振將兄子也 西域傳作安犂靡
烏安聲相近

兩龔傳

執金吾閭崇 公卿表作閭宗

鮑宣傳

宣不知情宋祁曰情字上疑有其字 按後漢書孔融
傳漢律與罪人交關三日已上皆應知情知情者應
坐罪不知情者不坐故揚雄傳云雄不知情有詔勿

問宋子京疑情上當有其字蓋未收漢律也

韋賢傳

黼衣朱紱注朱紱爲朱裳畫爲亞文也亞古弗字 亞當作𠂔兩己相背也與亞次字音義全別此朱紱諸侯之服當訓爲韠不當作黼黻解師古注誤

丙吉傳

豈宜褒顯 豈宜者猶言宜也古人語急以豈不爲不可爲可此當言豈不宜亦語急而省文耳朱子文疑當爲直字非孟堅之旨

睦孟傳

攷異

孝昭元鳳三年正月 睦孟言災異涉妖妄蓋夏賀良之流其事已見五行志不必別爲立傳

夏侯勝傳

初魯共王分魯西寧鄉以封子節侯別屬大河大河後更名東平故勝爲東平人 按魯共王子寧陽侯恬瑕邱侯政皆諡節侯此傳所稱節侯蓋寧陽侯也地理志寧陽屬泰山郡不屬東平蓋宣帝建東平爲王國復以寧陽屬它郡

從始昌受尙書及洪範五行傳說災異 始昌習尙書名已見儒林傳其說災異祇有言柏梁臺災事附見

勝傳可矣乃以兩夏侯題其篇目何也

京房傳

房以建昭二年二月朔拜上封事 二月當作三月以
三統術推是年正月甲午朔二月甲子朔房封事所
稱辛酉者正月二十八日也已卯庚辰辛巳則二月
之十六十七十八日也張晏注以辛巳蒙氣乘卦爲
晉卦解卦太陽侵色爲大壯攷卦氣圖晉解大壯皆
二月卦則房上封事必在二月後矣

廼辛巳蒙氣復乘卦太陽侵色張晏曰晉卦解卦也太
陽侵色謂大壯也 以三統術推是年二月二十四

日丁亥春分其前六日辛巳正當晉卦用事之始而
蒙氣乘之春分後解卦用事又六日七分而大壯乃
用事則三月癸巳朔也大壯消息卦晉解皆雜卦

迺丙戌小雨丁亥蒙氣去 丙戌四月二十四日其明
日丁亥直小滿小畜卦用事亦雜卦也

己丑夜有還風盡辛卯 己丑四月二十七日辛卯二
十九日

至癸巳日月相薄 癸巳五月二日正當乾卦用事之
始而有相薄之異故云邪陰同力而太陽爲之疑也
翼奉傳

注翼氏風角曰木落歸本水流歸末故木利在亥水利在辰利當作刑木刑於亥水刑於辰火刑於午金刑於酉五行家所謂自刑也亥爲木之生方故云本辰爲水之死方故云末

七月己酉地復震以三統術推初元二年七月己未朔無己酉日恐是乙酉之誤

蓋聞聖賢在位

云云

按元帝紀初元二年三月詔書

舉茂材異等直言極諫之士文與此略同其七月又有詔書却無舉直言極諫事此傳誤合兩詔爲一因添一年地再動之語

今年太陰建於甲戌 古法太陰與太歲不同奉上封
事在初元二年以今法推之太歲正在甲戌蓋以太
歲爲太陰實自奉始矣漢初言太歲者皆用超辰之
法故太初之元歲在丙子依此下推初元二年歲當
在癸酉而云甲戌者以三統歲術計之太初元年歲
星在婺女六度已是星紀之末則太歲亦在丙子之
末太歲與歲星每年多行一分至太始二年歲星已
度壽星而入大火太歲亦超乙酉而在丙戌矣故算
至初元二年太歲得在甲戌也

注孟康曰太陰在甲戌則太歲在子 按太陰在戌六

歲當在申孟說非也

律以庚寅初用事歷以甲午從春孟康曰十一月庚寅日黃鍾律初起用事也按推律自歲前十一月始

依三統術推得初元二年天正癸亥朔

卽初元元年十一月也

冬至與朔同日庚寅則月之二十八日也冬至日黃鍾律始用事孟云庚寅日黃鍾律初起用事其法未詳也又以三統術推是年二月四日甲午春分故云歷以甲午從春

尹翁歸傳

少子岑歷位九卿至後將軍岑字子河嘗爲執金吾

元延元年爲後將軍公卿表作右將軍誤

韓延壽傳

延壽代蕭望之爲左馮翊而望之遷御史大夫按公卿表望之之後尙有左馮翊彊一人非卽以延壽代也望之由馮翊遷大鴻臚又二年而拜御史大夫其時延壽亦爲左馮翊矣傳所書未核

鄭崇傳

上遂下詔曰朕幼而孤皇太后躬自養育惠澤茂焉前追號皇太后父爲崇祖侯惟念德報未殊朕甚愍焉侍中光祿大夫商皇太后父同產子其封商

爲汝昌侯 按哀帝紀建平四年二月封帝太太后
從弟侍中傅商爲汝昌侯六月尊帝太太后爲皇太
太后此詔稱皇太太后史家追改

蕭望之傳

下少府宋畸問狀注畸音居宜反 公卿表作宋疇字
之譌也宣帝紀有詹事畸師古曰宋畸也亦音居宜
反蓋由詹事歷大鴻臚左馮翊遷少府

蕭育傳

歷冀州青州兩部刺史 育又爲朔方刺史
見馮野王傳 本
傳失書

馮奉世傳

其先馮亭爲韓上黨守 此傳述馮氏先世百有餘言
與司馬遷揚雄自序略相類疑馮商續太史公書亦
有自序孟堅仍其元文耳

送大宛諸國客至伊脩城 西域傳吏士四十人因伊
循循脩二字相似因譌作脩耳三國志蜀後主傳費
禕爲蜀降人郭循所殺禕傳亦作郭循而魏三嗣主
傳張疑傳竝作郭脩

東平王宇傳

詩不云乎毋念爾祖述脩厥德 述與聿同爾雅適自

也孫炎云通古述字讀聿

定陶王康傳

追尊其王爲共皇帝 帝字衍文哀帝紀外戚傳但云
共皇無稱帝之文丁姬初稱共皇后後稱帝太后太
后之號從子不從夫也漢制非有天下者不稱帝故
高帝父太公稱太上皇而後漢追稱孝德皇孝崇皇
孝仁皇皆不稱帝

匡衡傳

於是司隸校尉王尊劾奏衡

此奏已見尊傳較此

文爲詳

封樂安侯食邑六百戶 恩澤侯表作六百四十七戶

此舉其成數耳

初元元年郡國誤以閭佰爲平陵佰 漢時郡國各有圖至魏猶狀清河平原爭界八年夏二刺史不決孫禮請以烈祖初封平原時圖決之是也

衡遣從史之僮收取所還田租穀千餘石入衡家 按

衡以建昭三年封侯距初元之元已十三年又四歲爲成帝建始元年衡多收租入三歲矣此租穀千餘石卽三歲中多收之數郡初上計簿時還之官至是乃復收之也以是推之列侯封戶雖有定數要以封

界之廣狹定租入之多寡不專以戶數爲定也

司隸校尉駿少府忠行廷尉事劾奏衡 按公卿表衡以建始三年十二月免相而張忠爲少府在建始四年不應有劾衡事衡免相時廷尉則何壽也

薛宣傳

壹关相樂師古曰关古笑字也

說文無笑字

徐鉉本增入

关亦不知所从當卽芙蕖之芙說文娛从女芙聲女子笑也莞爾之莞亦从艸明芙卽古笑字矣漢隸从竹从艸之字皆省作𦰩後人往往相亂如著作字當从竹而反从艸笑語字當从艸而反从竹皆由隸省

而譌也隸書艸在上者或變爲兩點一畫故班史或作关亦有作咲者此卽从艸之證李陽水謂竹得風其體天屈如人之笑較之以竹鞭犬稍爲近理要皆臆造不可信

翟義傳

熙我念孺子師古曰熙歎辭 大誥熙作已已蓋熙之省文

谷永傳

傳曰飢而不損茲謂泰厥災水厥咎亡師古曰洪範傳之辭 按五行志乃京房易傳之文非洪範傳文小

顏注誤也五行志厥咎牡亡此傳脫牡字

師丹傳

上於是追尊定陶共王爲共皇帝 帝字衍下文稱共
皇者不一辭皆不云帝也詳見定陶王康傳

揚雄傳

百牙絕絃破琴 卽伯牙也古文伯百通用

贊曰雄之自序云爾 予謂自雄之自序云爾以下至
篇終皆傳文非贊也司馬遷傳亦稱遷之自序云爾
狀後別述遷事以終其篇與此正同遷有贊而雄無
贊者篇中載桓譚及諸儒之言褒貶已見不必別爲

贊也此贊曰二字後人妄增非班史本文

儒林傳

擇掌故以補中二千石屬文學掌故補郡屬備員師古
曰云備員者示以升擢之非藉其實用也按師古
說非也平津本意以詔書爾雅浚厚非俗吏所解故
選文學掌故補卒史所謂以儒術緣飾吏事也安得
云不藉其實用乎備員蓋蒙上不足之文謂如有不
足當以文學掌故充之毋使缺額耳中二千石屬卽
謂內史大行卒史郡屬卽謂郡卒史劉攽謂卒史遷
而爲屬亦非是

沛戴崇子平崇爲九卿 公卿表無崇名據張禹傳崇

蓋任少府也

喜因不肖仞 仞古認字說文無認

唯京氏爲異黨焦延壽獨得隱士之說託之孟氏不相
與同師古曰黨讀曰儻 惠棟曰按文義當以黨字
屬上句異黨猶言異類也

商善爲算著五行論歷四至九卿 以公卿表攷之永
始三年詹事許商爲少府綏和元年又由侍中光祿
大夫爲大司農其年又遷光祿勳當云三至九卿也
又據溝洫志商嘗爲博士將作大匠河隄都尉皆在

未爲詹事以前

號其門人沛唐林子高爲德行平陵吳章偉君爲言語
重泉王吉少音爲政事齊炅欽幼卿爲文學 班史
書人名字例至精密它傳已見字者不要書唐林字
子高已見鮑宣傳而又書者因三人而類及之也

王式東平新桃人也 按地理志東平國無新桃縣後
漢書光武紀龐萌蘇茂圍桃城注任城國有桃聚故
城在今兗州任城縣北又劉永傳龐萌自號東平王
屯桃鄉之北注桃鄉故城在今兗州龔邱縣西北此
卽東平之新桃也

琅邪左咸咸爲郡守九卿 公卿表建平元年左咸爲
大司農三年爲左馮翊元壽二年復由復土將軍爲
大鴻臚元始五年又爲大鴻臚蓋四至九卿矣

循吏傳

九江以召父應詔書 信臣不書名非史例也蓋寬饒
傳稱魏相爲魏侯鄭崇蕭育傳稱貢禹爲貢公敘傳
稱桓譚爲桓生皆史家刊正未歸畫一

酷吏傳

南陽有梅免百政師古曰梅百皆姓也 百與伯通
於是賜小史爵關內侯食遺鄉六百戶 漢制列侯大

攷異

者萬餘戶小者數百戶武帝時襄城侯桀龍四百戶
騏侯駒幾五百二十戶牒侯畢取五百一十戶荻苴
侯韓陶五百四十戶邗侯李壽一百五十戶壽封戶
太少疑
有而圉小史得食六百戶是列侯封邑有時不如關
內侯之多也

僂輿出瘞寺門桓東如淳曰陳宋之俗言桓聲如和今
猶謂之和表師古曰卽華表也 桓和華聲皆相近
游俠傳

拜鎮戎大尹天水太守 按王莽改天水曰鎮戎太守
爲大尹旣云鎮戎大尹不當更云天水太守疑本注

文後人誤入正文

佞幸傳

鄧通蜀郡南安人也地理志南安屬犍爲郡不屬蜀郡犍爲武帝所置漢初蓋屬蜀也

韓嫣弟說亦愛幸以軍功封案道侯巫蠱時爲衛太子所殺子增封龍雒侯雒當作頌大司馬車騎將軍自有傳

按說增父子已附韓王信傳說以愛幸故又牽連書於嫣傳不必更及其子也

后姊嬪爲龍雒思侯夫人雒當作頌韓寶嗣父增爲

龍頌侯諡曰思

朱詡子浮建武中貴顯至大司馬司空封侯 按後漢書浮爲大司空未嘗爲大司馬也豈以其嘗爲大司馬主簿相涉而誤歟

南粵傳

故濟北相韓千秋 李陵傳作濟南相

西域傳下

昆莫王號也名獵驕靡後書昆彌云師古曰昆莫本是王號而其人名獵驕靡故書云昆彌昆取昆莫彌取驕靡彌靡音有輕重耳蓋本一也 予謂小顏說非也昆彌卽昆莫彌莫聲相轉猶宛王毋寡一作毋鼓

鼓寡聲相轉其實一耳莫之爲彌譯音有輕重而名號未改非取王名之一字而沿以爲號也

焉書國王治員渠城 員渠卽焉耆之轉與尉犂國王治尉犂城危須國王治危須城初不異也

外戚傳上

孝惠張皇后 少帝恆山淮南濟川王皆以非孝惠子誅 淮南當作淮陽

孝景王皇后 初皇太后徵時所爲金王孫生女俗在民間師古曰言隨俗而在閭巷未顯貴 子謂俗蓋金氏女之名

孝武陳皇后 堂邑侯午薨生男須嗣侯 功臣表作

季須

史皇孫王夫人 封舅無故爲平昌侯武爲樂昌侯食

邑各六千戶 外戚侯表無故武皆六百戶

外戚傳下

孝成許皇后 五月庚子鳥焚其巢太山之域 五行

志河平元年二月庚子泰山山桑谷有戴焚其巢此

作五月誤

下文有三月四月可證

后姊平安剛侯夫人謁等 董敎增曰表未見此侯惟

卬成家有安平侯王舜子章諡剛侯狀非平安也予

謂地理志千乘郡有平安侯國當是王舜所封若豫章郡之安平侯國則長沙孝王子所封涿郡之安平又非侯國也

孝成趙皇后 票騎將軍貪者錢不足計事 票騎將軍謂曲陽侯王根也

於是免新成侯趙欽欽兒子成陽侯訢皆爲庶人 按外戚侯表成陽節侯趙臨以皇后父侯薨子訢嗣新成侯欽以皇太后弟封建平元年皆坐弟昭儀絕繼嗣免表以欽與訢皆爲昭儀之兄傳以訢爲欽兒子必有一誤

孝平王皇后 迎皇后於安漢公第宮師古曰本是莽
第以皇后在是因呼曰宮 董敦增曰此當以第爲
句宮字連下豐歆讀卽前文大司徒宮大司空豐光
祿大夫歆三人也顏氏第宮之說失之遠矣

王莽傳上

前將軍何武後將軍公孫祿互相舉 按公卿表何武
傳俱云祿爲左將軍此作後將軍誤也

王莽傳中

義陽東都曰六州 地理志雒陽莽曰宜陽卽此義陽
也

其以益歲以南付新平新平故淮陽蘇林曰陳留圉縣
莽改曰益歲 按地理志圉縣本屬淮陽不屬陳留
豈莽時嘗改屬陳留乎圉縣莽曰益歲今地理志亦
無之

昏以戊寅之旬爲忌日 莽以戊子代甲子爲六旬首
戊寅旬中無子故忌之

王莽傳下

夙夜連率韓博 按地理志不夜縣莽曰夙夜此云連
率則莽嘗置爲郡矣壽光縣莽曰翼平亭而此傳有
翼平連率田況亦其類也

立安爲新遷王服虔曰遷音仙師古曰遷猶僊耳不勞
假借音 予謂遷之讀仙乃是古音律歷志少陰者
西方西遷也陰氣遷落物西遷聲相轉猶尙書大傳
云西方鮮方也莽稱紫閣圖文太一黃帝皆得瑞以
遷今本或作僊所謂新遷者乃太一新遷之後也諸遷字
皆作僊解故知服音爲是

直貨錢二十五 食貨志作貨泉錢卽泉字

曾世祖與兄齊武王伯升 伯升光武之兄故字而不
名劉聖公光武所事也故亦稱字

迫措前隊醜虜 莽改南陽爲前隊所云醜虜指光武

兄弟也孟堅於王莽指斥之詞無所隱諱所以著莽之惡於光武盛德初無損也

敘傳上

上於是引商丹入爲光祿大夫伯遷水衡都尉與兩師並侍中按公卿表元延元年侍中光祿大夫趙彪大伯爲侍中水衡都尉三年卒計其年正許商師丹除侍中光祿大夫之時也伯爲水衡都尉表不應失載疑趙彪卽班伯之謚

旣繫學於世教矣 攀古戀字說文無戀

思有短褐之褻 短當作袒說文袒豎使布長襦貢禹

貨殖傳並有短褐不完之語

又況么膺尙不及數于鄭氏曰膺音麼小也晉灼曰此骨偏膺之膺也師古曰鄭音是也骨偏膺自音寐與此義不相合晉說失之 予按說文無麼字徐鉉等新附而有憊字憊癘病也與膺同么言其小膺言其病童謠所稱見一蹇人言欲上天隗囂少病蹇以是刺之也晉說得之

吹中穌爲庶幾兮師古曰吹古聿字 吹从曰不从日詩邇求厥寧說文引作吹

敘傳下

泐泐紛紛 卽呂刑泐泐芬芬也泐泐聲相近詩縣縣
其庶韓詩作民民

六世耽耽其欲激激 易其欲逐逐子夏傳作攸攸蘇
林音攸爲迪迪逐聲相近

漢書四

廿二史攷異九

錢大昕學

侯國攷

漢制列侯所食邑爲侯國西京侯者封戶有多少所食或盡一縣或止一鄉一亭皆以侯國稱之如陳平封陽武之戶贖鄉公孫丞相封高成之平津鄉匡衡封僮之樂安鄉師丹封厚邱之中鄉何武封不其之氾鄉所食不過一鄉皆別於縣而自爲侯國恩有降殺秩無尊卑也後漢始定爲都鄉侯鄉侯都亭侯亭侯之差於是有侯而不爲國者矣高祖之世功臣侯者百五十餘人其

封邑所在班孟堅已不能言之武昭以後侯者班表始著其地亦有不備者蓋疑而闕之或轉寫脫去也地理志載侯國皆據當時見存者若中山之曲逆陳平所封清河之鄒樂布所封南陽之冠軍霍去病所封汝南之定陵淳于長所封丹陽之秣陵胡孰江都易王子所封魏之陰安濟北貞王子所封志皆不云侯國者其時國已除也攷哀平間侯國志皆不書王子侯表堂鄉以下十一侯恩澤侯表殷紹嘉以下三侯皆成帝綏和以後所封而志亦不之及然則志所書侯國蓋終於成帝元延之末惟博山一侯或後人增加也志稱侯國二百四

十一今數之止百九十有四子證以諸表各標其始封姓
名又補志之失注者二十五人後之簡班史者庶有取焉

何東郡

騏驎幾

東郡

陽平

王禁
志失注

陳留郡

長羅

常惠

潁川郡

成安

郭忠

周承休

建寧年

汝南郡

陽城 劉德

安成 王崇

宜春 王訢

弋陽 任官

歸德 先賢擇

安昌 張禹

安陽 王音

博陽 丙吉

成陽 趙廣

南陽郡

鄧 蕭何

博山 孔光

安衆 長沙定王子丹

春陵 長沙定王子買

新都 王莽

紅陽 王立

樂成 許延壽

博望 許舜

復陽 長沙頃王子延年

南郡

高成

長沙頃王子梁表作高城勃海亦有高城縣與長沙太遠志失注

江夏郡

鍾武 長沙頃王子度

廬江郡

松茲 六安其王子霸

九江郡

當塗 魏不害

博鄉 六安其王子交

曲陽

王根

山陽郡

城都

王商表作成都

黃

梁敬王子順表在齊陰

爰戚

趙長年

郃成

王奉光封郃成侯宋祁曰郃當作叩表在濟陰

中鄉

梁敬王子延年

平樂

梁敬王子遷

鄭

梁敬王子罷軍

甯鄉

梁敬王子就表在濟南

栗鄉

東平思王子護

曲鄉

梁荒王子鳳表在濟南

西陽

東平思王子並表在東萊

沛郡

廣戚

楚孝王子勳

公邱

魯共王子順

敬印

魯共王子政封侯當卽此

沒

敬肅王子周舍

建成

黃霸

建平

杜延年表在濟陽

栗

趙敬肅王子樂

扶陽

韋賢

高

梁敬王子舜

高柴

梁敬王子發

漂陽

梁敬王子欽志失注

平阿

王譚

東鄉

梁敬王子方志失注

臨都

梁敬王子未央志失注

義成

甘延壽志失注

祁鄉

梁夷王子賢

魏郡

卽裴

趙敬肅王子道表作擲裴在東海

卽會

趙敬肅王子仁

平恩

許廣漢

邯溝

趙頃王子悝表作邯溝

攷異

鉅鹿郡

象氏

趙敬肅王子賀

新市

廣川繆王子吉

安定

燕刺王子賢

歷鄉

廣川繆王子必勝

樂信

廣川繆王子彊

武陶

廣川繆王子朝

柏鄉

趙哀王子買

安鄉

趙哀王子喜

常山郡

桑中

趙頃王子廣漢

封斯

趙敬肅王子胡傷

樂陽

趙頃王子說

平臺

史元

都鄉

趙頃王子景
表在東海

清河郡

東陽

清河縣王子宏

信鄉

清河縣王子豹
表作新鄉

涿郡

廣望

中山靖王子忠

州鄉

河間獻王子崇

樊輿

中山靖王子修

成

中山康王子喜

良鄉

趙共王子交封
梁鄉侯或卽此

利鄉

中山頃王子安
表在常山

臨鄉

城陽頃王子雲
陽當作廣陽表誤

城
益昌

廣陽頃王子晏

陽鄉

廣陽頃王子發

西鄉

廣陽頃王子容

阿武

河間獻王子豫

高郭

河間獻王子盛

新昌

燕刺王子慶

勃海郡

定 齊孝王子越

參戶 河間獻王子免

柳 齊孝王子陽己

臨樂 中山靖王子光

脩市 清河綱王子寅

景成 河間獻王子雍

章鄉 鍾肅
未作章鄉

蒲領 清河綱王子祿

平原郡

平昌 王無故

羽 齊北式王子成

富平 張安世

合陽 梁喜

樓虛 營順

龍頤 韓官

安 濟北貞王子樂
侯 姑日陽應作楊謹也
表作安陽

千乘郡

平安

王舜封安平侯卽此史記將相名臣表本作平安漢表誤也

被陽

齊孝王子燕

繁安

齊孝王子忠

延鄉

李譚志失注

濟南郡

朝陽

黃陵厲王子望

獠

趙敬肅王子起

宜成

燕倉表作宜城在濟陰

泰山郡

柴

齊孝王子代志失注

寧陽

魯共王子恬

富陽

東平思王子萌志失注

桃山

城陽孝王子欽

桃鄉

東平思王子宣

式

城陽荒王子憲志失注

攷異

漢書

六

齊郡

廣

菑川孝王子便
志失注

廣饒

菑川靖王子國
志失注

北鄉

菑川孝王子澤

平廣

菑川孝王子服
封平侯當卽此

臺鄉

菑川孝王子畛
志失注

北海郡

劇魁

菑川懿王子黑

甄

城陽順王子息

劇

菑川懿王子錯

平望

菑川懿王子賞

平的

菑川懿王子強

柳泉

膠東戴王子彊
表在南陽

樂望

膠東戴王子光

饒

膠東康王子有成侯饒
疑表誤當爲饒侯成也

平城

膠東項王子邑

密鄉

膠東項王子林

羊石

膠東頃王子回

樂都

膠東頃王子新

石鄉

膠東頃王子理

上鄉

膠東頃王子欽

新成

膠東頃王子根
表作新城

成鄉

高密頃王子安

膠陽

高密頃王子恁封膠東侯
膠東王國名當是膠陽也

東萊郡

平度

菑川懿王子行
志失注

臨胸

菑川懿王子奴
表在東海志失注

牟平

齊孝王子業
志失注

陽樂

膠東頃王子獲封
樂陽侯疑卽此

徐鄉

膠東共王子缺
志失注表在齊

琅邪郡

虛水

城陽頃王子禹

臨原

菑川懿王子始昌
表在臨泉下注云臨

原史記
作臨原

鉗苗川靖王子成

雲齊孝王子信

皋虞膠東康王子建

茲鄉城陽荒王子宏

高廣城陽荒王子勳

柔城陽荒王子山封棗侯當卽此字形相涉

麗高密共王子賜封

伊鄉城陽戴王子遷

高陽薛宣

祓城陽項王子霸封挾侯當卽此

零段城陽項王子澤志作序蔑

稻齊孝王子定

魏其膠東康王子昌

箕城陽荒王子文

高鄉城陽惠王子休

卽來城陽荒王子俊

武鄉高密項王子慶

新山稱忠

昆山城陽荒王子光

參封

城陽戴王子嗣

折泉

城陽荒王子根

博石

城陽荒王子淵

房山

城陽荒王子勇

慎鄉

表未見

駟望

冷廣

安邱

高密項王子常

高陵

翟方進

臨安

膠東共王子閔

石山

城陽戴王子元

東海郡

良成

魯安王子文德

蘭祺

魯安王子臨朝

南成

城陽共王子貞

山鄉

魯孝王子綰

建鄉

魯頃王子康

容邱

魯安王子方山

東安

魯孝王子盈

建陽

魯孝王子咸

攷異

漢書

八

于鄉 泗水勤王子定

平曲 廣陵屬王子會

都陽 城陽戴王子音

陰平 楚孝王子回

邵鄉 魯頃王子閔

武陽 史丹

新陽 魯頃王子永

建陵 魯孝王子遂

昌慮 魯孝王子宏
表在泰山

都平 城陽荒王子邱

臨淮郡

西平 于定國
志失注

高平 王逢時

開陵 成煥

昌陽 泗水吳王子霸

廣平 廣陵孝王子德

蘭陽 廣陵孝王子宜
封蘭陵侯此

襄平 廣陽屬王子登劉歆曰
廣陽無厲王當是廣陵

樂陵 史高

豫章郡

海昏

昌邑哀王子賀志失注

安平

長沙孝王子習表在鉅鹿誤

桂陽郡

陽山

長沙孝王子宗

陰山

表未見

零陵郡

夫夷

長沙定王子義志失注

都梁

長沙定王子定

泉陵

長沙定王子賢表作衆陵誤

廣平國

南曲

清河縣王子遷志失注

曲梁

平干頃王子敬志在魏郡

廣鄉

平千頃王子明表在鉅鹿志失注

平利

平千頃王子世表在魏郡志失注

平鄉

平千頃王子子表在魏郡志失注

陽臺

平千頃王子田封陽城侯卽此

城鄉

平千頃王子慶表作成鄉志失注

信都國

樂鄉

河間獻王子佟表在鉅鹿鄉誤卿

平隄

河間獻王子招表在鉅鹿

桃

廣川繆王子良表在鉅鹿志失注

西梁

廣川戴王子闢兵表在鉅鹿

昌成

廣川繆王子元

東昌

清河綱王子成

志未見者

利昌

代共王子嘉

懷昌

菑川懿王子高遂史記作襄

頃陽

膠東頃王子共

昌鄉

膠東頃王子憲以元壽二年免

卑梁

高密頃王子都

乘邱

東平思王子頃
疑卽泰山之乘邱乘

誤字

陵石

膠東共王子慶
疑卽東萊之陽石

樂昌

王武表在沙南

問侯國例不屬諸侯王故王子而侯者必別屬漢郡
廣平信都亦諸侯王國也而得有侯國何故曰班志
郡國之名以元始二年戶口籍爲斷其侯國之名則
以成帝元延之末爲斷元延之世廣平信都皆郡也
非國也國已除爲郡則從前之改屬它郡者復返其
舊迨哀帝建平中復置此二國則侯國必仍改屬它
郡特史家不能一一載之爾試觀廣平領縣十六而

戶止二萬七千有奇信都領縣十七而戶止六萬五
千有奇以附近郡國準之不應縣多而戶少乃爾蓋
改郡爲國之後未必仍領若干縣也